

Broj: 02-02-1-82-2-04/19  
Maglaj, 14. ša'ban, 1440. H.g.  
19. april, 2019. godine

Na osnovu članova 4., 26. stav 1., 29. stav 1. alineja 2., 39. stav 3. i 40. stav 4. alineja 2. i 3. Ustava Islamske zajednice u Bosni i Hercegovini i člana 17. stav 1. alineja 7. i 11. Pravilnika o organizaciji i radu Medžlisa Islamske zajednice, Izvršni odbor MIZ Maglaj, na svojoj 3. redovnoj sjednici, održanoj dana 19.04.2019. godine, usvojio je (prečišćen tekst):

## **P R A V I L N I K**

### **O ČLANSTVU, ČLANOVIMA, ČLANOVIMA KOJI NEREDOVNO PLAĆAJU ČLANARINU, PRIPADNICIMA ISLAMSKE ZAJEDNICE, PRAVIMA, OBAVEZAMA I UVJETIMA PRUŽANJA OBAVEZNIH I NEOBAVEZNIH USLUGA**

#### **Član 1.**

Ovaj Pravilnik uređuje članstvo u Islamskoj zajednici u Bosni i Hercegovini (u daljem tekstu: Islamska zajednica) na području Medžlisa Islamske zajednice Maglaj (u daljem tekstu: Medžlis), prava i obaveze članova Islamske zajednice (u daljem tekstu: članovi), članova Islamske zajednice koji neredovno plaćaju članarinu (u daljem tekstu: neredovni članovi) i pripadnika Islamske zajednice, kao i uvjete pružanja obaveznih i neobaveznih vjerskih usluga.

#### **Član 2.**

Sredstva od članarine Islamske zajednice (u daljem tekstu: članarina) koriste se za organizovano odvijanje vjerskog života na području Medžlisa, stvaranje optimalnih uvjeta za vjerske aktivnosti, kao i za besplatno ili pod povoljnijim uvjetima pružanje vjerskih usluga članovima.

#### **Član 3.**

**Članovi** su pripadnici Islamske zajednice koji su dobrovoljno prihvatili članstvo u Islamskoj zajednici, izvršavaju propisane obaveze, redovno plaćaju članarinu i čiji dug za istu nije veći od jednogodišnjeg iznosa članarine za kategoriju kojoj pripadaju.

Članovima se smatraju i osobe koje se nalaze na privremenom radu u inostranstvu i plaćaju članarinu u džematu privremenog boravka - ako je isti u legalnom sastavu Islamske zajednice, ili stalno ili privremeno žive i plaćaju članarinu na području drugog medžlisa u Bosni i Hercegovini.

Članovi iz predhodnog stava ne mogu ostvariti pravo na vjerske usluge bez plaćanja propisane nadoknade, izuzev ako plaćaju članarinu za kategoriju kojoj pripadaju i na području Medžlisa Islamske zajednice Maglaj najmanje pet godina.

#### **Član 4.**

**Neredovni članovi** su članovi koji neredovno plaćaju članarinu ili je njihov dug za članarinu veći od jednogodišnjeg iznosa članarine za kategoriju kojoj pripadaju.

Neredovni članovi će steći prava na koja imaju članovi mjesec dana nakon što izmire svoj dug za članarinu ili ponovo steknu status člana.

#### **Član 5.**

**Pripadnici Islamske zajednice** su osobe (muslimani i muslimanke) koje ne plaćaju članarinu i ne nalaze se u evidenciji članstva Islamske zajednice.

## **Član 6.**

Članarina za tekuću godinu se izmiruje prije nastupa nove kalendarske godine.

Članovima i neredovnim članovima se svakog 1. januara i 1. jula na njihov postojeći saldo dodaje zaduženje u visini polugodišnjeg iznosa članarine za kategoriju kojoj pripadaju.

Članarina se uplaćuje na centralnoj blagajni u administrativnom sjedištu Medžlisa, ili kod džematskih inkasanata, ili putem platnih listi, ili uplatom na transakcijski račun Medžlisa.

Članarina se može plaćati i u ratama, osim u uvjetima koje je ovaj Pravilnik precizno definisao.

Odluku o visini članarine za postojeće kategorije donosi Izvršni odbor Medžlisa.

## **Član 7.**

Postoji dvije kategorije članarine na području Medžlisa:

- 1) članarina za penzionere i
- 2) članarina za radno-sposobne.

Na ime članarine se može uplatiti i veći iznos u odnosu na visinu članarine za kategoriju kojoj članovi pripadaju.

Osobe koje žele da plate članarinu su dužne pod punom moralnom i materijalnom odgovornošću dati tačne podatke ovlaštenom licu na osnovu kojih se određuje njihova pripadajuća kategorija članarine, kao i prijaviti sve promjene statusa koji utiču na vrstu kategorije članarine.

## **Član 8.**

Osnov za naplatu članarine na području Medžlisa je bračna zajednica, starosna dob i radni status, prema uvjetima koje je precizno definisao ovaj Pravilnik.

Supružnici bračne zajednice plaćaju jednu članarinu.

Djeca roditelja koji redovno plaćaju članarinu smatraju se također članovima, ukoliko i sama nisu postali samostalni obveznici plaćanja članarine.

Muške osobe (i ženske osobe ukoliko su zaposlene, do penzionisanja) postaju obveznici i zadužuju se članarinom za kategoriju radno-sposobnih od navršene dvadeset pete (25.) godine života (ili od ranije, ako su formirale bračnu zajednicu) do navršene šezdeset pete (65.) godine života (ili do penzionisanja).

Izuzetno, muške osobe koje nisu u bračnoj zajednici i nisu zasnovale radni odnos, mogu biti oslobođane plaćanja članarine od navršene dvadeset pete (25.) do navršene tridesete (30.) godine života, ukoliko svake godine – za tekuću godinu, u administrativno sjedište Medžlisa budu dostavljale potvrdu o nezaposlenosti (Biro).

Također, muške osobe koje su navršile trideset (30) godina života ili su oženjene, a nisu zaposlene i nemaju nikakva primanja, mogu od 1. januara do 31. marta u administrativnom sjedištu Medžlisa podnijeti zahtjev za promjenu kategorije članarine za tekuću godinu. Izvršni odbor Medžlisa će ih, uz prethodnu saglasnost džematskog odbora, za tekuću godinu zadužiti članarinom za kategoriju penzionera.

Ženske osobe koje nisu u bračnoj zajednici (neudate ili razvedene) i nisu zasnovale radni odnos, mogu biti oslobođane plaćanja članarine od navršene dvadeset pete (25.) do navršene pedesete (50.) godine života, ukoliko svake godine, od 1. januara do 31. marta – za tekuću godinu, u administrativno sjedište Medžlisa budu dostavljale potvrdu o nezaposlenosti (Biro).

## **Član 9.**

Ukoliko je muž zadužen članarinom za kategoriju radno-sposobnih, a supruga je penzioner, bračni par plaća članarinu predviđenu za kategoriju radno-sposobnih, sve dok i muž ne postane penzioner ili navrší šezdeset pet (65) godina.

Ukoliko je muž penzioner, a supruga je zadužena članarinom za kategoriju radno-sposobnih, bračni par plaća članarinu predviđenu za kategoriju radno-sposobnih, sve dok i žena ne postane penzioner.

## **Član 10.**

Invalidnine za šehitske porodice, ratne vojne invalide i civilne žrtve rata, kada je riječ o određivanju kategorije članarine, imaju isti tretman kao i starosne, invalidske i porodične penzije.

Ukoliko je osoba korisnik jedne od gore navedenih invalidnina, a zasnovala je i radni odnos, ista je obavezna plaćati članarinu za kategoriju radno-sposobnih.

## **Član 11.**

Osobe sa posebnim potrebama, kao i osobe koje su oboljele od neizlječive bolesti prije nego li su postali samostalni obveznici plaćanja članarine, koje trajno trebaju tuđu njegu i patronat i koje se ne mogu smatrati radno-sposobnim mogu biti oslobođane plaćanja članarine.

Osobe u stanju socijalne potrebe (tj. materijalno neobezbijedene osobe) mogu biti oslobođane plaćanja članarine. Kriterije po kome se osoba proglašava osobom u stanju socijalne potrebe donosi Izvršni odbor Medžlisa. Džematski odbor, poštujući kriterije koje je donio Izvršni odbor, evidentira osobe u stanju socijalne potrebe, kao i osobe sa posebnim potrebama, i podatke o njima dostavlja Izvršnom odboru Medžlisa petnaest (15) dana prije kraja tekuće godine. Izvršni odbor Medžlisa će, nakon što ustanovi opravdanost prijedloga džematskog odbora, evidentirane osobe osloboditi plaćanja članarine za narednu godinu.

Vjerska usluga dženaze za osobe sa posebnim potrebama i osobe u stanju socijalne potrebe, bez naplaćivanja ikakve nadoknade, obaviti će se samo ako iste nemaju staratelja, nasljednika ili skrbnika, niti posjeduju pokretnu ili nepokretnu imovinu.

## **Član 12.**

### **PRAVA I OBAVEZE ČLANOVA**

Članovi, pored prava zagwarantovanih Ustavom, imaju pravo, bez plaćanja ikakve nadoknade, i prije nego li izmire u potpunosti svoj dug za članarinu, i na sljedeće: uslugu šerijatskog vjenčanje, uslugu učenja ezana i ikameta novorođenčetu i uslugu učenja dove prilikom sunnećenja muškog djeteta.

Za umrle članove obezbjeđuje se, bez plaćanja ikakve nadoknade, a nakon što se izmiri u potpunosti njihov dug za članarinu, sljedeće: usluga gasula, usluga kopanja kabura, usluga klanjanja dženaze-namaz i odlaska jednog imama na kabur, te tabut, ćefini, daske i bašluci.

## **Član 13.**

### **PRAVA I OBAVEZE NEREDOVNIH ČLANOVA**

Neredovni članovi, pored prava zagwarantovanih Ustavom, imaju pravo, uz plaćanje propisane nadoknade, i prije nego li izmire u potpunosti svoj dug za članarinu, na uslugu šerijatskog vjenčanja, uslugu učenja ezana i ikameta novorođenčetu i uslugu učenja dove prilikom sunnećenja muškog djeteta.

Vjerska usluga dženaze obaviti će se, bez naplaćivanja ikakve nadoknade, samo ako su umrli neredovni članovi svoj dug za članarinu izmirili (ili su stekli status člana) najmanje mjesec dana prije svoje smrti.

## Član 14.

### NAČIN UČLANJENJA, PRAVA I OBAVEZE PRIPADNIKA ISLAMSKJE ZAJEDNICE

Pripadnici Islamske zajednice učlanjaju se u Islamsku zajednicu tako što im se obračunava dug za članarinu za prethodne godine - od njihove trenutne godine starosti (ili, ukoliko su u bračnoj zajednici, od prosječne godine starosti bračnog para) pa unazad, do dvadeset pete (25.) godine života, po visini članarine za penzionere, ukoliko iskažu namjeru da iznos duga za članarinu za prethodne godine plate najedanput.

Ukoliko pripadnici islamske zajednice iskažu namjeru da iznos duga za članarinu za prethodne godine plaćaju u ratama, isti će im se obračunati po visini članarine za kategoriju kojoj trenutno pripadaju.

Članovi, od godine učlanjenja u Islamsku zajednicu, moraju plaćati članarinu po visini članarine za kategoriju kojoj trenutno pripadaju.

Muške osobe koje nisu u bračnoj zajednici, nisu zasnovale radni odnos i nisu navršile trideset (30) godina života učlanjaju se u Islamsku zajednicu donošenjem potvrde o nezaposlenosti (Biro) u administrativno sjedište Medžlisa. Iste postaju obveznici i zadužuju se članarinom za kategoriju radno-sposobnih, ukoliko:

- 1) stupe u radni odnos, ili
- 2) formiraju bračnu zajednicu, ili
- 3) propuste, od 1. januara do 31. marta – za tekuću godinu, donijeti potvrdu o nezaposlenosti (Biro) ili
- 4) navršte trideset godina (30) života.

Ženske osobe koje nisu u bračnoj zajednici (neudate i razvedene), nisu zasnovale radni odnos i nisu navršile pedeset (50) godina života, učlanjaju se u Islamsku zajednicu donošenjem potvrde o nezaposlenosti (Biro) u administrativno sjedište Medžlisa. Iste postaju obveznici i zadužuju se članarinom radno-sposobnih, ukoliko:

- 1) stupe u radni odnos, ili
- 2) formiraju bračnu zajednicu ili
- 3) propuste, od 1. januara do 31. marta – za tekuću godinu, donijeti potvrdu o nezaposlenosti.

Ukoliko se nakon učlanjenja u Islamsku zajednicu donošenjem potvrde o nezaposlenosti ne desi ni jedan od tri gore navedena slučaja, iste postaju obveznici i zadužuju se članarinom za kategoriju penzionera od navršene pedesete (50.) godine života.

Članovi koji su iskoristili pravo na oslobođanje od plaćanja članarine za tekuću godinu na osnovu donošenja potvrde o nezaposlenosti imaju ista prava kao članovi koji su izvršili novčanu uplatu članarine, izuzev prava na besplatnu vjersku uslugu dženaze.

Ako se pripadnici Islamske zajednice učlane u Islamsku zajednicu, a ne uplate iznos duga za članarinu za prethodne godine najedanput, oni su postali neredovni članovi i imaju sva prava i obaveze koje se vežu za neredovne članove.

Ako se za pripadnike Islamske zajednice, bez obzira o kojim osobama je riječ (definisano u članu 8.), zatraži vjerska usluga dženaze, za iste se mora, prije obavljanja vjerske usluge dženaze, uplatiti sva neplaćivana članarina, od godine života u kojoj su umrli pa unazad - do dvadeset pete (25) godine života, po trenutnoj visini članarine predviđene za kategoriju kojoj su umrli pripadali, kao i svi troškovi vjerske usluge dženaze.

## **Član 15.**

Pripadnik Islamske zajednice koji zahtijeva bilo koju vrstu usluge za umrlog člana nakon njegove četeresnice, neće moći ostvariti istu dok i sam ne postane član.

## **Član 16.**

Odluku o učlanjenju pripadnika Islamske zajednice pod povoljnijim uvjetima ili izmirenju duga neredovnih članova pod povoljnijim uvjetima u odnosu na uvjete koje je precizirao ovaj Pravilnik može donijeti Izvršni odbor Medžlisa. U slučaju donošenja takve odluke, period za učlanjanje ili izmirenje duga pod povoljnijim uvjetima bit će ograničenog trajanja, ista će se sprovoditi u administrativnom sjedištu Medžlisa i bit će oglašena putem hutbi, službene internet-stranice Medžlisa, plakata i lokalnih medija.

## **Član 17.**

Ovlašteni radnik u administrativnom sjedištu Medžlisa ili džematski inkasant koji naplaćuju članarinu odgovorni su za namjerne ili nenamjerne greške koje naprave prilikom učlanjenja pripadnika Islamske zajednice, naplate duga za članarinu člana ili neredovnog člana i naplate nadoknade za obavljene vjerske usluge. Isti će ispraviti nanešenu materijalnu štetu koju su načinili prema Islamskoj zajednici ili prema stranci koja je oštećena.

## **Član 18.**

Imam ne može obaviti vjersku uslugu podnosiocu zahtjeva za uslugu, ukoliko se nisu ispunili uvjeti za pružanje usluge koje je definisao ovaj Pravilnik. U suprotnom, imam će ispraviti nanešenu materijalnu štetu (nenaplaćene članarine) koja je načinjena prema Islamskoj zajednici.

## **Član 19.**

Članu Islamske zajednice se izdaje članska knjižica, a oblik i sadržinu iste utvrđuje Izvršni odbor Medžlisa. Popunu članske knjižice i unos podataka o uplati članarine vrši ovlašteni radnik Medžlisa ili džematski inkasant.

## **Član 20.**

Podaci o članovima i neredovnim članovima evidentiraju se u centralnoj bazi podataka u administrativnom sjedištu Medžlisa i Matičnoj knjizi džemata.

## **Član 21.**

Iznos nadoknade za pružanje svih obaveznih i neobaveznih vjerskih usluga utvrđuje se Odlukom Izvršnog odbora Medžlisa.

## **Član 22.**

Zahtjev za pružanje svih usluga vezanih za dženazu podnosi se isključivo kod Službe za dženaze u administrativnom sjedištu Medžlisa.

Sve vjerske usluge vezane za dženazu podnosilac zahtjeva plaća a izvršilac naplaćuje isključivo na centralnoj blagajni u administrativnom sjedištu Medžlisa.

## **Član 23.**

Za obavljanje svih vjerskih usluga koje zatraži član, neredovni član i pripadnik Islamske zajednice, nadležan je imam džemata u kojem podnosilac zahtjeva ima prijavljeno prebivalište.

Za obavljanje vjerske usluge dženaze nadležan je imam džemata u kojem je umrla osoba imala prijavljeno prebivalište.

U slučaju da se umrla osoba ukopava u mezarje drugog džemata (ako je isti u sastavu Medžlisa), pored nadležnog imama, prilikom izvršavanja vjerskih usluga vezanih za dženazu bit će pozvan i imam džemata u kojem se nalazi mezarje.

Ako osoba u toku svog života pismenom izjavom koja je pohranjena u arhivi Medžlisa oporuči da imam njegovog džemata ne predvodi obavljanje usluge njegove dženaze, istu će izvršiti glavni imam lično ili lice koje on ovlasti.

Ako osoba koja traži određene vjerske usluge vezane za dženazu svog umrlog ne pristaje da nadležni imam, ili glavni imam, ili službeno lice koje ovlasti glavni imam predvodi klanjanje dženaze, ista gubi pravo na korištenje infrastrukture Islamske zajednice za obavljanje vjerskih usluga vezanih za dženazu.

#### **Član 24.**

Svaku vjersku uslugu imam mora pružiti u skladu sa islamskim propisima, maturidijskom akaidu, hanefijskom mezhebu, islamskoj tradiciji Bošnjaka i zahtjevima vremena.

#### **Član 25.**

Nepridržavanje odredaba ovog Pravilnika predstavlja povredu službene dužnosti i podliježe odgovornosti u skladu sa aktima Islamske zajednice.

#### **Član 26.**

Stupanjem na snagu ovog Pravilnika prestaju da važe odredbe Pravilnika o članstvu, članovima, članovima koji neredovno plaćaju članarinu, pripadnicima Islamske zajednice, pravima, obavezama i uvjetima pružanja obaveznih i neobaveznih usluga broj: PR-00-PI-490-1-12/15 od 18. decembra, 2015. godine.

#### **Član 27.**

Tumačenje ovog Pravilnika, kao i rješenja za slučajeve koji nisu u Pravilniku spomenuti, daje Izvršni odbor, ili predsjednik Izvršnog odbora, glavni imam i pravnik Medžlisa, uz prethodno međusobno konsultovanje.

#### **Član 28.**

Izmjene i dopune Pravilnika stupaju na snagu danom donošenja, a primjenjivat će se od 14. ša'bana, 1440. H.g. / 19. aprila, 2019. godine.

Ranije stečena prava ne mogu biti umanjena stupanjem na snagu ovog Pravilnika.

**PREDSJEDNIK:**

**prof. Seid Omerović, mr. ecc**

